

ԱՐՄԵՆԱԿ ԳՐԻԳՈՐՅԱՆ

ԱՐՎԵՍՏԱԲԱՆՈՒԹՅՈՒՆԸ ՈՐՊԵՍ ԱՐԴԻ
ՄՇԱԿՈՒԹԱՅԻՆ ԱԶԳԻ ԿԱՅԱՑՄԱՆ ՃԱՆԱԴԱՐՅ.
ԳԱՐԵԳԻՆ ԶՈՎՍԵՓՅԱՆԻ
ՅՐԱՊԱՐԱԿԱՆՈՍԱԿԱՆ ԳՈՐԾՈՒՆԵՈՒԹՅՈՒՆԸ¹

19-րդ դարի վերջում հայության մոտ մշակութային ազգի գաղափարը որոշակի ձեւավորման փուլում էր: Այս պրոցեսում է հատկապես արվեստաբանությունը կայանում որպես մասնագիտություն: Արվեստաբանության հիմնական խնդիրներից էր վերարժեվորել հայ միջնադարյան ժառանգությունը որպես արվեստի պատմություն: Նմանօրինակ կարելուր նպատակն իրականացնելու արդյունավետ միջոց էր հրապարակախոսությունը: Արվեստաբանության եւ հրապարակախոսության հարաբերության տեսանկյունից է, որ կղիտարկենք, ըստ էության առաջին հայ արվեստաբան՝ Գարեգին Զովսեփյանի գործունեությունը: Վերջինս ի ցույց է դնում հայերի շրջանում արվեստաբանության որպես մասնագիտության կայացումը:

Զովսեփյանը, սովորելով Գերմանիայի Զալլե-Վիտենբերգի, Բեռլինի, այնուհետեւ Լայպցիգի համալսարաններում, ուսումնասիրում է աստվածաբանություն, փիլիսոփայություն, հնագիտություն: 1897թ. ուսումնավարտում է փիլիսոփայության դոկտորի աստիճանով եւ վերադառնում էջմիածին: 1900թ. սկսած Զովսեփյանը համագործակցում է *Արարատ* հանդեսի հետ եւ 1907-1908թթ., ինչպես նաեւ 1918-1919թթ. ղեկավարում խմբագրությունը:² 1908թ. *Արարատում* հայագիտական հոդվածներին եւ ուսումնասիրություններին լայն տեղ հատկացնելու համար Զովսեփյանը՝ կաթողիկոս Մատթեոս Բ. Կոստանդնուպոլսեցի (Իզմիրլյանի) պահանջով հեռացվում է խմբագրի պաշտոնից.

Ի նկատի առեալ, զի Արարատ ամսագիր ընդ Ձերով խմբագրութեամբ ոչ ծառայէ նպատակի իւրում որպէս կրօնական թերթ եւ որպէս պաշտօնական բերան Ս. Էջմիածնի, թէւ քանիցս արարեալ ենք Ձեզ նկատողութիւն: Ուստի եւ այսու արծակեմք զՁեզ ի պաշտոնէ խմբագրութեան...³

Այս դեպքը հնարավորություն է տալիս կանխադրելու, որ Զովսեփյանը նպատակ ուներ *Արարատը* վերածել հայկական պատմամշակութային ժառանգության գիտական ուսումնասիրման հարթակի: Ըստ այդմ, մամուլը դառնում է գիտության միջոցով ազգային գիտակցության սերմանման հնարավորություն:

Արվեստաբանությունը հենց այս համատեքստում է ստանում իր կոչումը: Մանյա Ղազարյանը՝ Հովսեփյանին դիտարկելով որպես հայ արվեստի պատմությունը ուսումնասիրող առաջին հայ արվեստաբան, գրում է.

Օտարների հետաքրքրությունը խթան հանդիսացավ հայ մշակույթի նկատմամբ որոշակի կարծիք ստեղծելուն, սակայն նրանց ուսումնասիրությունները կտրված էին հայ ժողովրդի կյանքի ընդհանուր զարգացման լուծյունից: Առաջին հետազոտողը, որը հայկական արվեստը գնահատեց նրա պատմական ու ազգային մտածողության հիմքի վրա՝ Գարեգին արքեպս. Հովսեփյանն էր:⁴

Իր գործունեությունը Հովսեփյանը սկսում է որպես ժողովրդական բանահյուսության հավաքագրող եւ ուսումնասիրող:⁵ Նա համագործակցում էր հայ մեծանուն բանասեր, կրկին Գերմանիայում իր բարձրագույն ուսումը ստացած՝ Սանուկ Աբեղյանի հետ: Հովսեփյանը համարում էր, որ սեփական ժողովրդի ակունքներին մոտենալու եւ ազգային մշակույթի ձեւավորման հիմքերը բացահայտելու համար պետք է մանրագնին հետազոտել ժողովրդի կենցաղը, սովորույթները եւ բարոյական նորմերը: Այս առիթով նա գրել է.

Պատմությունը ազգի քաղաքակրթության աստիճանաբար զարգացումն է նկարագրում, իսկ առանց ժողովրդի ծանոթության անկարող ենք իմանալ, թե ի՞նչ առաջադիմություն է արել քաղաքակրթությունը ամբողջության մեջ, որի հիմքը հասարակ ժողովուրդն է: Ծանոթանալով ժողովրդի առօրյա կյանքի, նիստուկացի, սովորությունների, կրոնա-բարոյական գաղափարների եւ այլ հայացքների հետ՝ ընդունակ կլինենք որոշելու ժողովրդի հոգեկան զարգացման աստիճանը:⁶

Ենթադրելի է, որ «ազգի քաղաքակրթական զարգացում» ասելով՝ Հովսեփյանը նկատի ունի արդեն 19-րդ դարի կեսերից եվրոպայում տիրող ազգերի արդիականացման գործընթացները: Հովսեփյանի գիտական ժառանգությունը բաժանվում է մի քանի կարեւոր խմբերի. կրոնա-եկեղեցական, պատմա-հնագիտական, մատենա-բանասիրական եւ մշակութային: Այս ամենի ուսումնասիրության համար պեղումներ եւ մշակութային արտեֆակտների հավաքչություն անելուց բացի՝ նրա համար շատ կարեւոր ուսումնասիրման նյութ էին հանդիսանում ձեռագրերը. «Մենք պարծենալ կարող ենք ամենաքաղաքակրթ ազգերի կողքին մեր 20.000 տուփ կամ հատոր ձեռագիրներով, ուր պահված են հայ մտքի եւ անցյալի ամբողջ արտադրությունը, մեր ազգային ամենամեծ հարստությունը»:⁷ Հոգեւորական, բանասեր, արվեստաբան, պատմաբան՝ Գարեգին Հովսեփյանի հայացքում հայ միջնադարյան ժառանգության գիտական ուսումնասիրությունը պայման է հայ ժողովրդի որպես ազգ արդիանալու համար:

Սեփական միջնադարյան մշակույթը որպես ազգակերտման հնարավորություն ընկալելը 18-19-րդ դարերի եվրոպայում, մասնավորապես Գերմանիայում մեծ տեղ գտած երևույթ էր: Պետականության բացակայության պայմաններում, մշակույթը դրվում էր միացյալ ազգի եւ պետականության կայացման հիմքում: Գերմանական ռոմանտիկներից սկիզբ առնող այս միտումը 19-րդ դարում դրվեց հումանիտար գիտության բնագավառների՝ այդ թվում արվեստաբանության օրակարգում:⁸ Այս սկզբունքով էր առաջնորդվում նաեւ Զովսեփյանը. հայերը կարիք ունեն անդրադառնալու իրենց անցյալի ամեն մի դեպքի ու առարկայի՝ որպեսզի աշխարհի պատմության մեջ ներկա լինեն որպես ազգ. «Ազգի գոյության հիմքը նրա անցյալի գիտակցությունն է, նրա մշակույթը: Պետք է ճանաչենք այդ մշակույթի իսկական արժեքը եւ պահենք զայն»:⁹ Այս մեջբերումից պարզ է դառնում, որ Զովսեփյանի համար անցյալի գիտակցությունը եւ մշակույթը ազգի կայացման գրավականներն են: Արդյունքում ստացվում է, որ ժողովուրդը առանց սեփական մշակույթի պատմական գիտակցության չի կարող արդիանալ որպես ազգ:

Այժմ դիտարկենք Զովսեփյանի որոշ հոդվածներ, որոնք տպագրվել են *Արարատում*, երբ նա ղեկավարում էր ամսագրի խմբագրությունը: Այս հոդվածների միջոցով ցույց կտանք, թե հրապարակախոսության միջոցով ինչպե՞ս է տեղի ունենում հայ պատմական անցյալի գիտակցումը արվեստաբանության տեսանկյունից: Կտեսնենք, որ հայ միջնադարյան մշակութային ժառանգության վերարժեվորումը, որպես հայ արվեստի պատմություն, հետապնդում էր մի քանի նպատակներ. կառուցել մշակութային ազգ, հիմնավորել հայերի արդի ազգ լինելու բաղձանքը եւ հաստատել արվեստաբանությունը որպես գիտակարգ (դիսցիպլին), այն է՝ արվեստագիտություն:

Արարատի 1907թ. հուլիս-օգոստոս համարում հանդիպում ենք Զովսեփյանի հեղինակած «Հայրենասիրություն եւ քրիստոնեություն» բնութագրական վերնագրով մի հոդվածի:¹⁰ Վերջինս հիմնալիորեն բացահայտում է այն արժեհամակարգը, որը ընկած է Զովսեփյանի արվեստագիտական գործունեության հիմքում: Զոդվածում Զովսեփյանը խոսում է հայրենասիրության գաղափարի առաջացման եւ զարգացման մասին: Նախ, նա բացատրում է, թե ինչ է հայրենասիրությունը, եւ ինչպես ինքն է համարում՝ դա այնպիսի բնական զգացմունք է, ինչպիսին մարդկանց սրտի խորքում եղած սերն է ծնողի նկատմամբ: Համարելով, որ հայրենասիրության սաղմը հայրենի տունն ու ընտանիքն է, Զովսեփյանը հղում է Պլատոնին. «Մարդը հասարակութեան բաղաբացիութեան համար է ստեղծուած, ասել է Պլատոնը եւ խմբակցութեան ամենափին ձեւը ընտանիքն է»:¹¹ Զովսեփյանը խոսելով ընտանիքի ձեւավորման մասին, շարու-

նակում է կարելորել համայնքի, այնուհետև ազգի ձեւավորման գաղափարը: Չամարելով, որ ազգը համախմբվածության արդյունք է՝ առաջացած բնական կյանքի գոյության կովում, նա գրում է. «Մի ձեռքը ծափ չի տալիս, իսկ հազարավոր ձեռքեր են հարկաւոր կեանքի բարդ անիւր առաջ տանելու համար»:¹² Չովսեփյանը գտնում է, որ հայրենասիրության գաղափարը սկզբում լինելով բնագոյ, հետագայում մարդկության զարգացմանը զուգահեռ դառնում է ավելի խորը գիտակցութուն: Նա նշում է, որ նյութական շահերի պաշտպանության հետ զարգանում է հոգեւոր շահերի պաշտպանության գաղափարը եւ ավելացնում, որ անձնական փառքի, պատվի, ապահովության եւ բարօրության հետ զարգանում է ազգի ու հայրենիքի փառքի, ապահովության եւ բարօրության գաղափարը: Թվարկածները համարելով այն կարելոր կետերը, որ ընկած են հին ազգերի մտածողության հիմքում՝ Չովսեփյանը գրում է.

Եւ այս գիտակցութիւնից է բխում հին ազգերի ամենաբարձր առաքինութիւնը՝ քաղաքացիութեան եւ հայրենասիրութեան զգացումը: Ազգութեան գաղափարը այն առանցքն էր, որի շուրջն էր պտտում հին ազգերի պատմութեան անիւր:¹³

Չովսեփյանը՝ հին ազգեր ասելով, նկատի ունի հույներին, հռոմեացիներին եւ հրեաներին: Խոսելով այս ազգերի մասին նա փորձում է ցույց տալ քրիստոնեւթյան դերը հայրենասիրության գաղափարի փոփոխութեան մեջ: Իր կարծիքով քրիստոնեւթյան հաստատումով հայրենասիրութիւնը ստացավ ավելի մաքուր ընկալում. «Նա մաքրեց հայրենասիրութիւնը եսական եւ բարբարոսական տարրերից եւ մի բարոյական զգացումը դարձրեց այն»:¹⁴ Ըստ Չովսեփյանի, փաստորեն, քրիստոնեւթիւնը եկավ հաղթահարելու անտիկ քաղաքացիական հայրենասիրութիւնը՝ վերջինս վերածելով ընդհանուր մարդկային բարոյական զգացումի: Սա անտիկ հայրենասիրութիւնից դեպի քրիստոնեական հայրենասիրութեան շրջադարձի այն մեկնաբանութիւնն է, որը տալիս է գերմանական ռոմանտիկների առաջնեկ Յ. Գ. Յերդերը եւ որը ժամանակին այդքան հոգեհարազատ էր եղել Ստեփանոս Նազարյանցին:¹⁵ Չովսեփյանի հայացքում ժամանակակից քրիստոնյա ազգերը հին քաղաքակրթութեան կրողներն են, ինչի գիտակցումն էլ նրանց արդի մշակութային ազգ լինելու գրավականն է:

Արարատի նույն համարում լույս է տեսնում Չովսեփյանի գրչին պատկանող մի գրախոսական հայ հին մատենագրութեան եւ Փոքր Չայքի մանրանկարչութեան մասին:¹⁶ Գրախոսականի առաջին մասում Չովսեփյանը խոսում է 1904թ. Տյուրքիզենի արքայական մատենադարանի կողմից ձեռք բերված 104 հատորից բաղկացած հայ ձեռագիր ժողովածուի մասին: Այս ձեռագրերի

ցուցակը կազմել են Ֆրանց Նիկոլաուս Ֆինքը եւ Լեւոն Գյանջեցյանը:¹⁷ Զովսեփյանը բարձր է գնահատում այս ձեռագրերի ձեռքբերման փաստը, դրանց ցուցակագրումը եւ ավելացնում, որ այս աշխատության նախաբանը գրել է Տյուրինգենի մատենադարանապետ Կարլ Գայգերը: Զովսեփյանը գրում է. «Նախնեաց մատենագրութեան եւ պատմութեան ուսումնասիրութեան համար շատ կարեւոր նշանակութիւն ունի հայ ձեռագրերի մանրամասն ցուցակագրութիւնը»:¹⁸ Այնուհետեւ հողվածի երկրորդ մասում նա խոսում է Տյուրինգենի հայ ձեռագրերի նոր ժողովածուի հիման վրա՝ Ֆինքի կատարած ուսումնասիրությունների մասին: Զովսեփյանը այս աշխատանքը համարում է ոչ ամբողջական, քանի որ Ֆինքը հիմնվել է միայն վերը նշված ժողովածուի վրա: Բայց, ըստ նրա, դա չի նշանակում, որ աշխատանքը անպետք է. «Սակայն այս համառոտութիւնն արգելք չէ, որ ընթերցողը հայագիտութեան այս աննշակ ճիւղի մասին բավական որոշ գաղափար ստանայ»:¹⁹ Զովսեփյանը նաեւ նշում է, որ մի առանձին գլխի մէջ հեղինակը հիմնվելով նախորդ մասնագետների ուսումնասիրությունների վրա՝ աշխատում է եվրոպացի հայագետների համար պարզել հայ հնագրության արժեքը, ձեռագրերի հնությունը որոշելու համար:

Գրախոսականի երրորդ մասը վերնագրված է «Փոքր Զայաստանի մանրանկարչությունը», որը վերաբերում է Յոզեֆ Ստրժիգովսկու համանուն աշխատությանը: Զովսեփյանը կարելորդ է Ստրժիգովսկուն իբրեւ բյուզանդական արվեստի մասնագետ եւ հեղինակություն, ում հայացքները բյուզանդական արվեստի ժազման մասին համարում է բոլորովին նոր: Զովսեփյանը խոսում է Տյուրինգենի համալսարանի ժողովածուում տեղ գտած մի ավետարանի՝ Ստրժիգովսկու կատարած ուսումնասիրության մասին: Զովսեփյանը հատուկ ուշադրություն է դարձնում, թե ինչպէս է Ստրժիգովսկին նկարագրում ավետարանիչներին եւ նրանց ավետարանների սկզբնազարդերը: Ըստ Զովսեփյանի Ստրժիգովսկին ձգտում է ցույց տալ, որ.

Զայոց մեջ ասորական մանրանկարչութիւնից յետոյ սկսւում է բիւզանդական ազդեցութիւնը: Բայց այժմ նոր նիւթերի վրայ հիմնուելով պնդում է, որ թէ Զայոց եւ թէ բիւզանդական դեկորատիւ արուեստը կախումն ունին պարսկականից, որ միջին դարերում իշխող էր արեւելքում:²⁰

Զովսեփյանը ավելացնում է, որ Տյուրինգենի ավետարանը հայ արվեստի պատմության համար այն կարեւոր նշանակություն ունի, որ ցույց է տալիս, թե հայերն անմիջապէս Պարսիկներից են յուրացրել ձեռագրերի արվեստը եւ ոչ միջնորդապէս Բյուզանդիայից: Այստեղ հստակորեն երեւում է, որ Զովսեփյանը ձգտում է Ստրժիգովսկու միջոցով եւ նրա հետ միասին անհատականացնել հայկական արվեստը՝ ցույց տալով, որ այն սերում է հենց սկզբնաղբյուրից:

Արդյունքում Հայաստանի միջնադարյան արվեստը համագոր է բյուզանդականին: Ավելին, հիմնվելով Ստրժիգովսկու վրա, Հովսեփյանը անգամ ենթադրում է. «Գուցէ նոյն իսկ Բիւզանդացիք [ծեռագրի արվեստը] Հայերի միջնորդութեամբ իւրացրած լինին սկզբում եւ ապա բարձր զարգացման հասցնելուց յետոյ, Հայերին աւանդած Սելջուկեան տիրապետութեան ժամանակ»:²¹ Փաստորեն այս գրախոսականում Հովսեփյանը հիմնվելով Ստրժիգովսկու վրա արդեն գիտական դիրքերից բարձրացնում է հայ արվեստի դերը Բյուզանդիա-Արեւելք միջմշակութային փոխանակություններում: Անցյալի իմացությունը որպէս ազգային արդի գիտակցության հիմք ընդունելու սկզբունքը Հովսեփյանը գործնականում իրականացնում է արվեստաբանությամբ:

1907թ. *Արարատում* Հովսեփյանը հրատարակում է մեկ այլ «Սեր Հոգեւոր Հայրենիքը» հատկանշական հոդվածը:²² Վերջինս իր հրապարակախոսական բնույթով մոտ է նախորդ՝ «Հայրենասիրություն եւ քրիստոնեություն» հոդվածին: Այստեղ Հովսեփյանը վերստին գրում է, որ հայ ժողովրդի հոգեւոր հայրենիքը պետք է փնտրել նրա անցյալի մէջ: Նա համոզված է, որ անցյալն ուսումնասիրելով կարելի է հասկանալ ժողովրդի բնորոշ գծերն ու հատկությունները. «այնտեղ է պատկերանում ժողովրդի հոգեւոր կեանքի եւ ընդհանուր քաղաքակրթութեան մէջ ցոյց տուած զարգացումը: Պատմութիւնը ազգերի կեանքի հայելին է, իսկ հայելու մէջ անդրադառնում է ճիշդ պատկեր»:²³ Հայերը չեն կարող ունենալ արդիություն, եթէ չեն ուսումնասիրում սեփական անցյալը.

Հայոց նոր արուեստ ու քաղաքակրթութիւն ծագել եւ ազգային դրոշմ ու գոյն կարող է ստանալ միայն նախնեաց արուեստի եւ քաղաքակրթութեան ուսումնասիրութեամբ:²⁴

Ակնհայտ է, որ արվեստաբանության կոչումը անցյալի արվեստի ուսումնասիրությամբ արդի արվեստ եւ քաղաքակրթության ապահովելն է: Փաստորեն արվեստաբանությունը ոչ թէ «մաքուր գիտություն» է, այլ «հոգեւոր հայրենիքի» կառուցման ու հիմնավորման գիտական գործունեություն, որը էապես իրականացվում է հրապարակախոսությամբ:

²¹ Իմ շնորհակալությունն եմ հայտնում Վարդան Ազատյանին՝ տեքստի գաղափարական, ոճական եւ կառուցվածքային ղեկավարման համար:

²² *Արարատը* հրատարակվել է 1868-1919թթ.: Լինելով Կովկասի առաջին հայագիտական հանդեսը մեծապես նպաստում էր գիտության այդ ճյուղի կայացմանն ու զարգացմանը: Հանդեսում տպագրվել են մատենագիտական բնագրեր, վավերագրեր, իշխատակարաններ, ուղեգրություններ, միջնադարյան հայ տաղերգուների երգեր եւ այլն:

²³ Տրված է՝ Գեորգ Արքեպիսկոպոս, «Պաշտոնականք», *Արարատ*, քիվ ԺԱ, 1908, էջ 3:

²⁴ Տրված է՝ Սանյա Ղազարյան, «Հայ արվեստի երախտավորը. Գարեգին արքեպիսկոպոս Հովսեփյան», *Էջմիածին*, քիվ 5, 1979թ., էջ 34:

⁵ Հովսեփյանի գործունեության այս բնագավառին հատուկ հոդված-ուսումնասիրություն է նվիրել Ս. Բ. Հարությունյանը. «Գարեգին Հովսեփյանը որպես բանագետ» (ծննդյան 100-ամյակի առթիվ), *Պատմա-բանասիրական հանդես*, թիվ 1, 1968, էջ 147-154: Տես նաև Խ. Քոլանջյան «Հայ ծեղագրաագիտության մեծանուն վաստակավորը» *Էքմիածին*, 1962, թիվ 6, 7, 8:

⁶ Տրված է՝ Ղազարյան, «Հայ արվեստի երախտավորը», էջ 7:

⁷ Գարեգին կաթողիկոս Հովսեփյան, *Ղեպի լույս եւ կյանք*, Անթիլիաս, 1947, էջ 235:

⁸ Այս մասին տես Юрген Хабермас "Что такое народ? К политическому самопониманию наук о духе в домартовский период революции 1848 года, на примере Франкфуртского собрания германистов 1846 года", *Политические работы* (Москва: Практикс, 2005), стр. 197-208:

⁹ Տրված է՝ Ղազարյան, «Հայ արվեստի երախտավորը», էջ 43:

¹⁰ Գարեգին Հովսեփյան, «Հայրենասիրություն եւ Զրիստոնություն», *Արարատ*, Յուլիս-Օգոստոս, թիվ է-Ը., 1907, էջ 616-625:

¹¹ Հովսեփյան, «Հայրենասիրություն եւ Զրիստոնություն», էջ 617:

¹² Հովսեփյան, «Հայրենասիրություն եւ Զրիստոնություն», էջ 617:

¹³ Հովսեփյան, «Հայրենասիրություն եւ Զրիստոնություն», էջ 617:

¹⁴ Գարեգին Հովսեփյան, «Հայրենասիրություն եւ Զրիստոնություն», *Արարատ*, Յուլիս-Օգոստոս, թիվ է-Ը., 1907, էջ 619:

¹⁵ Այս մասին տես՝ Վարդան Ազատյան, *Արվեստաբանություն եւ ազգայնականություն. 19-րդ դարի Գերմանիայի եւ հետխորհրդային Հայաստանի միջև*, գլուխ «Հայերի Հերդերը: Ստեփանոս Նազարյանց եւ Ստեփանոս Սապահ Գյուլյան», (անտիպ):

¹⁶ Գարեգին Հովսեփյան, «Գրախոսական», *Արարատ*, Յուլիս-Օգոստոս, համար է-Ը. 1907, էջ 727-741:

¹⁷ Նրանք հայտնի են որպես հայ-գերմանական *Հանդես հայագիտության (Zeitschrift für armenische Philologie)* թերթի խմբագիրներ եւ աշխատակիցներ: Նրանց հետ համագործակցել է նաեւ Հակոբ Մանանդյանը: Հանդեսը ուներ գիտական ուղղվածություն, որտեղ տպագրվում էին պատմության, լեզվաբանության եւ ազգագրության վերաբերյալ նյութեր: Պարբերագրքի հոդվածների մի մասը տպագրվել են գերմաներեն:

¹⁸ Գարեգին Հովսեփյան, «Գրախոսական», *Արարատ*, Յուլիս-Օգոստոս, համար է-Ը. 1907, էջ 727:

¹⁹ Գարեգին Հովսեփյան, «Գրախոսական», *Արարատ*, Յուլիս-Օգոստոս, համար է-Ը. 1907, էջ 731:

²⁰ Գարեգին Հովսեփյան, «Գրախոսական», *Արարատ*, Յուլիս-Օգոստոս, համար է-Ը. 1907, էջ 736:

²¹ Հովսեփյան, «Գրախոսական», էջ 736:

²² Գարեգին Հովսեփյան, «Մեր հոգեւոր հայրենիքը», *Արարատ*, Սեպտեմբեր, համար Թ, 1907, էջ 768-775:

²³ Գարեգին Հովսեփյան, «Մեր հոգեւոր հայրենիքը», *Արարատ*, Սեպտեմբեր, համար Թ, 1907, էջ 770:

²⁴ Հովսեփյան, «Մեր հոգեւոր հայրենիքը», էջ 772: